



(Ili dok te mamim šećerom te hranim, a kad te namamim...)

Pročitah ovih dana da je neko od ovih naših političara rekao nekom od svjetskih političara da će, k'o biva, Bosna i Hercegovina učiniti sve što je - u nekom dokumentu pretenciozno nazvanom *Bijela knjiga* - obećala o popravljanju uslova za strane investitore, a sve, ne bi li se oni jadni i naivni kakvi već jesu, stušili ka miloj nam domovini i investirali svoj teško stečeni novac u ovu oazu na rubu Europe... I zagrcnuh se, moram priznati, uhvaćena negdje između (histeričnog) smijeha i istog takvog plača...

Smijeha, jer je zaista (tragi)komično gledati ove naše kako sa entuzijazmom i uvjerljivosti malog djeteta ubjeduju strane pedagoge kako, bez obzira što do sada imamo sve same jedinice, od sutra ima da dobijamo petice! Informiraniji kažu da se čak znaju i zakleti intelektualnim i teškim zakletvama tipa "pas bio k'o slag'o" i "dabogda nam država propala ako slažemo"...

Plaća, zato što...? Ma dragi moji, suviše cijenim vašu inteligenciju da bih morala navoditi, a kamoli objašnjavati zašto se u ovoj zemlji može, a Boga mi i treba plakati...

Kako, dakle, ovi naši podržavaju strane investitore?

Evo nekoliko primjera:

► namamite strani kapital da investira u *Krivaju* praveći *Krivaju 18* i nešto. Kada ga namamite, onda mu otkrijete da je dotična firma nezakonito registrirana. Uz to koji put slažete investitora, a i radnike da čete namiriti radnička potraživanja i na kraju mu prioprijetite krivičnim prijavama i "nezavisnim" tužilaštвima čisto da mu bude drago što izvlači živu glavu, a sve da se ne dosjeti da traži, ne daj Bože, kakvu odštetu

► dodijelite koncesiju za izgradnju male hidroelektrane i onda mrtvi hladni promatrate i aktivno pomažete nezakonite blokade puta, lokacije i opreme investitora kome su lokalni šerif i bratija odlučili zabraniti da radi i gradi u skladu sa validnim papirima

► zakon o upravnom postupku omogućava npr. stanovniku jednog kraja grada da efektivno onemogući dobijanje građevinske dozvole nekome na suprotnom kraju grada. U Sarajevu, recimo, to može trajati i dvije do tri godine. I ne postoji mogućnost da, kada i dobijete dotičnog na sudu, nadoknadjite troškove uzrokovane toliko dugim zastojem.

► sudska naplata potraživanja traje barem dvije do tri godine

Itd.itd...

I kako jednom reče jedan naš lokalni šerif (s tendencijom da postane maršal...) - ni ovi stranci ne znaju šta hoće. Je li nam radna snaga jeftina - jest. Je li nam struja najjeftinija u Evropi (skoro) - jest. Je li nam stopa poreza najmanja u Evropi - jest. Pa u čemu je kvaka?

Pa u tome da su oni ovdje dovoljno dugo da su čuli, a Boga mi i gledali onu narodnu s početka ove priče - dok te mamim šećerom te hranim, a kad te namamim i hljeb ti zabranim...

Što će reći - sirena(c) iz naslova može pjevati koliko hoće. U koju god kajdu udari, ispadne da pjeva borbene.... B

Aida Delić,
glavna i odgovorna urednica